

Na osnovu člana 61. Zakona o upravi ("Službeni glasnik BiH", broj: 32/02 i 102/09), člana 19. stav 2. tačka a) Zakona o Agenciji za identifikacione dokumente, evidenciju i razmjenu podataka Bosne i Hercegovine ("Službeni glasnik BiH", broj: 56/08), te člana 23. stav (2) Zakona o ličnoj karti državljana Bosne i Hercegovine ("Službeni glasnik BiH", broj: 32/01, 16/02, 32/07, 53/07, 56/08 i 18/12), direktor Agencije za identifikacione dokumente, evidenciju i razmjenu podataka Bosne i Hercegovine donosi

U P U T S T V O
O NAČINU PODNOŠENJA ZAHTJEVA ZA IZDAVANJE UVJERENJA O ČINJENICAMA
IZ SLUŽBENE EVIDENCIJE O LIČNIM KARTAMA ELEKTRONSKIM PUTEM

Član 1.

(Predmet)

Ovim Uputstvom propisuje se način podnošenja zahtjeva za izdavanje uvjerenja o činjenicama iz službene evidencije o ličnim kartama elektronskim putem preko portala nadležnih organa iz člana 7. Zakona o ličnoj karti državljana Bosne i Hercegovine (u daljem tekstu: Zakon).

Član 2.

(Podnošenje zahtjeva)

(1) Zahtjev za izdavanje uvjerenja o činjenicama iz evidencija podnosi se elektronskim putem, korištenjem lične karte sa kvalificiranom potvrdom. Zahtjev se potpisuje unošenjem identifikacionog broja koji stranka koristi za digitalno predstavljanje.

(2) Zahtjev iz stava (1) ovog člana je urađen u elektronskoj formi i nalazi se na web stranici nadležnih organa.

(3) Zahtjev za izdavanje uvjerenja o činjenicama iz službene evidencije o ličnim kartama upućen elektronskim putem treba sadržavati svrhu izdavanja, način izdavanja i dostavljanja uvjerenja.

Član 3.

(Način podnošenja zahtjeva)

Zahtjev za izdavanje uvjerenja o činjenicama iz evidencija podnosi se putem web stranice nadležnog organa po mjestu prebivališta stranke ili boravišta raseljene osobe.

Član 4.

(Postupanje po zahtjevu)

(1) Nakon podnošenja zahtjeva, nadležni organ isti obrađuje i nakon što dobije potvrdu od nadležnog ovjerioca - Agencije za identifikacione dokumente, evidenciju i razmjenu podataka BiH - da je zahtjev podnesen korištenjem lične karte sa kvalificiranom potvrdom, pristupa podacima iz evidencije o ličnim kartama.

(2) Podnosiocu zahtjeva izdat će se Uvjerenje o činjenicama iz evidencija o ličnim kartama na obrascu LK/OI – 5 koji je propisan Pravilnikom o obrascu zahtjeva za izdavanje i zamjenu lične karte, postupku izdavanja i zamjene lične karte i načinu vođenja evidencija o zahtjevima.

(3) Uvjerenje iz stava (2) ovog člana može se izdati kao elektronski ili pisani dokument, kako to stranka navede u zahtjevu.

Član 5.

(Vrsta podataka i evidencija)

(1) Podnosiocu zahtjeva mogu se isključivo izdati uvjerenja koja sadržavaju podatke iz člana 22. Zakona.

(2) Evidenciju primljenih zahtjeva i izdatih uvjerenja vode nadležni organi u skladu sa odredbama o kancelarijskom poslovanju.

Član 6.

(Stupanje na snagu)

Ovo Uputstvo stupa na snagu osmog dana od dana objavljivanja u „Službenom glasniku BiH“, a primjenjivat će se od dana donošenja Odluke o početku izdavanja ličnih karata sa elektronskim memorijskim elementom.

Broj 15-01/02-2-93/13
23. januara 2013. godine

Direktor
Mr. **Siniša Macan**, s. r.